

29/08/1997

Sultan Brunei kunjungi Agong sebelum pulang

KUALA LUMPUR, Khamis - Yang di-Pertuan Agong Tuanku Ja'afar, hari ini menerima kunjungan perpisahan oleh Sultan Brunei, Sultan Hassanal Bolkiah yang menamatkan lawatan empat hari ke Malaysia pada satu majlis di Istana Negara di sini.

Sultan Hassanal Bolkiah diiringi Raja Isteri Pengiran Anak Hajah Saleha dan Pengiran Isteri Hajah Mariam. Raja Permaisuri Agong Tuanku Najihah turut berangkat ke majlis itu.

Turut hadir Perdana Menteri, Datuk Seri Dr Mahathir Mohamad dan isterinya, Datin Seri Dr Siti Hasmah Mohd Ali serta Menteri Pertanian, Datuk Amar Dr Sulaiman Daud, selaku menteri pengiring.

Sebelum itu, Timbalan Perdana Menteri, Datuk Seri Anwar Ibrahim dan Datin Seri Dr Wan Azizah Wan Ismail, menghadap Sultan Brunei di hotel penginapannya di sini untuk mengucapkan selamat jalan.

Isteri-isteri Sultan Brunei turut berangkat pada majlis itu. Sultan Brunei kemudian berangkat pulang ke Brunei Darussalam dari Lapangan Terbang Sultan Abdul Aziz Shah di Subang.

Dr Mahathir dan Dr Siti Hasmah berada di lapangan terbang itu untuk mengucapkan selamat jalan kepada baginda.

(END)